

Ռ. Ի. ՄԱԹԵՎՈՍՅԱՆ, Տաշիր-Ձորագետ (X դ.—XII դ. սկիզբ), ՀՍՍՀ ԳԱ հրատարակչություն, Երևան, 1982, 155 էջ.

Հայաստանում դարգացած ավատատիրության դարաշրջանի առաջին փուլի կեսերին (X դ.) երկրի տարբեր շրջաններում (Վասպուրական, Կարս, Տաշիր-Ձորագետ և այլն) առաջացան Ռադրատունի հայոց շահնշահին ստորադաս տեղական թագավորություններ, որոնցից վերջինի՝ Տաշիր-Ձորագետի, և այդտեղ իշխած Կյուրիկյանների X—XII դդ. պատմությունն է նվիրված զրա-իոսովոչ մենագրությունը։ Այդ շրջանում Տաշիր-Ձորագետն էական դեր է խաղացել թե՛ հայոց ներքին կյանքում և թե՛ հայ-վրացական հարաբերություններում։ Դրանով պետք է բացատրել այն կարեորությունը, որ ունի այդ երկրամասի և X—XII դդ. այդտեղ գոյատևած քաղաքական կազմավորումների պատմության հետազոտումը հայագիտության և կովկասագիտության համար։ Դեռ 1923-ին Վիննայի Մխիթարյաններից Ղ. Մովսեսյանը հանդես է եկավ «Լոռի Կյուրիկյան թագավորների պատմությունը» աշխատությամբ, որն արդեն 1927-ին թարգմանվեց ֆրանսերեն։ Վաստակաշատ հեղինակին արժանին մատուցելով հանդերձ, հարկ է նկատել, որ գիտության շահերը պահանջում էին Տաշիր-Ձորագետի և Կյուրիկյանների X—XII դդ. պատմության նորովի քննություն՝ հիմքում ունենալով մարքսիստական մեթոդոլոգիան ու սովետահայ պատմագիտության վերջին տասնամյակների նվաճումները։ Այդ խնդրի իրագործմանն էլ ձեռնամուխ է եղել Ռ. Մաթևոսյանը, միաժամանակ նկատելով, որ ամեն մի երկրի պատմությունը համակողմանի ուսումնասիրելու համար անհրաժեշտ է քննության տոնել նրա առանձին երկրամասերի անցյալը» (էջ 5)։

Գրախուսվող աշխատությունը բաղկացած է ներածությունից, որին թերևս ավելի կպատշաճեր «Աղբյուրների և գրականության տեսություն» խորագիրը, շոքս գլխից և վերջաբանից։ Դրում զետեղված են նաև գիտական ամեն մի հրատարակության խիստ անհրաժեշտ օգտագործված աղբյուրների և գրականության, անձնանունների ու տեղանունների ցանկեր, ինչպես նաև Աղստևի հովտի պատմական մի քանի հուշարձանների լուսանկարներ, Շահկան կլիններ, եթե գիրքն ունենար նաև հեղինակի տեղաչափ տեղագրական պրպտումների արդյունքներն արտացոլող պատմական համապատասխան քարտեզ։

Ներածության մեջ հեղինակը ավել է օգտագործված աղբյուրների ու գրականության տեսությունը և նկատել, որ «Հայաստանի դարգացած ֆեոդալիզմի դարաշրջանի (IX—XII դդ.) պատմության ուսումնասիրության ներկա վիճակը և շրջանառության մեջ գտնվող աղբյուրագիտական նոր հրապարակումներն են» (էջ 12) իրեն հնարավորություն տվել գրելու խնդրառարկա աշխատությունը։

Առաջին գլխում, որը վերնագրված է «Տաշիր-Ձորագետի պատմաաշխարհագրական ուղեւորակ», Ռ. Մաթևոսյանն անդրադարձել է երկրամասի ֆիզիկաաշխարհագրական բնութագրին և փորձել որոշ ճշգրտումներ կատարել Տաշիր-Ձորագետի պատմական աշխարհագրության շուրջ։ Նա մասնավորապես մեծ տեղ է հատկացրել Կայան ու Ձորոփոր գավառներին և Կայան ու Կայծոն բերդերի տեղագրության ճշտմանը։ Աղբյուրների համադրմամբ ու գրականության ուսումնասիրությամբ հեղինակը եկել է այն եզրակացության, որ Կայան գավառը X—XII դդ. գրադեցրել է Աղստև գետի միջին հոսանքի շրջակայքը և այնտեղ գտնվող Աղջկա բերդ կոչվող ամրոցատեղը նույնացրել է Կայան բերդի, իսկ նրան մերձակա այժմ Մանթաշ անունով հայտնի ամրոցատեղը՝ Կայծոն բերդի հետ։ Ինչ վերաբերում է Ձորոփոր գավառին, ապա այն, Ռ. Մաթևոսյանի կարծիքով, քննվող ժամանակաշրջանում կազմել է Կայան գավառի ձախակողմյան հատվածը։

Աշխատության երկրորդ գլխում, որը նվիրված է Գուգարքում Տաշիր-Ձորագետի (Կյուրիկյան) թագավորության կազմավորմանը, քննվել է երկու հարց։ Տաշիր-Ձորագետը Բագրատունյաց ուստանի վարչական մարզ և Տաշիր-Ձորագետում թագավորության կազմավորման նախադրյալներն ու ժամանակը։ Այս հարցերի ուսումնասիրությունը հեղինակին բերել է այն համոզման, որ X դ. սկզբից մինչև 966 թ. Տաշիր-Ձորագետը եղել է Բագրատունյաց ուստանի

վարչական մարզը, որը կոչված էր նորոգ հայոց պետության սահմանները պաշտպանել Տփլիսի ու Ատրպատականի արաբական ամիրայությունների ոտնձգություններից և սկզբում կառավարվում էր վերակացուների, իսկ ապա՝ թագավորին զահակից թագածառանգի կողմից: Այնուհետև Ռ. Մաթևոսյանը մեծ տեղ է հատկացրել կենտոտ հարցերից մեկի՝ Տաշիր-Ձորագետի թագավորության ստեղծման թվականի ճշտմանը: Բանն այն է, որ խնդրո առարկա սարևթիվը տարբեր թվականներով (979, 980, 982) են նշանակել ոչ միայն այդ հարցով զբաղված հետազոտողները (Մ. Չամչյանը, Ղ. Մովսեսյան, Ի. Ղարիբյան), այլև գրախոսվող աշխատության հեղինակը (972, 969): Այժմ արդեն, հիմք ունենալով Ամենափրկիչ եկեղեցու կառուցման թվականները (957—966) և այդ տարիներին վերագրելով Տաշիրի եկեղեցական թեմի կազմավորումը, Ռ. Մաթևոսյանը եզրակացրել է, որ Տաշիր-Ձորագետի թագավորության կազմավորումը պետք է հաշվել առնվազն 966-ից. քանի որ Տաշիրում թեմ չէր ստեղծվի «եթե չլինե՞ր այն քաղաքական կազմավորումը, որը կարիք ունենար սեփական եկեղեցական թեմի» (էջ 65): Հեղինակը միանգամայն ճիշտ է, նկատելով, որ «Տաշիր-Ձորագետում թագավորության կազմավորումը մի շարք ռազմաքաղաքական միջոցառումների արդյունք էր, որոնք իրականացվում էին աստիճանաբար, ուստի անհնարին է ցույց տալ նրանց ավարտման որևէ կոնկրետ թվական... ակնհայտ է, որ վերափոխումները տեղի էին ունեցել Աշոտ Գ-ի ժամանակ՝ 957—966 թթ. ընթացքում» (էջ 66):

Աշխատության երրորդ գլխում հեղինակն արծարծել է երկու հարց. Տաշիր-Ձորագետը XI դ. և Կյուրիկյան թագավորության անկումը: Ռ. Մաթևոսյանին հաջողվել է սպառել լուսաբանել Դավիթ Անհողինի ծավալած ռազմաքաղաքական ու շինարարական գործունեությունը և հայոց շահնշահի գահին տիրելու նրա հավակնությունները, որոնք ինչպես հայտնի է, անհաջող ավարտ ունեցան: Այնուհետև նա անդրադարձել է երկրամասը սելջուկներից պաշտպանելու ուղղությամբ Դավիթ Անհողինի որդի Կյուրիկե Ա-ի գործադրած ջանքերին, մի կողմից Կյուրիկյանների, իսկ մյուս կողմից սելջուկների ու հղորացող վրացական պետության փոխհարաբերություններին: Հեղինակը իրավացի է, գրելով, որ Ա-ի ու Կարսի անկումից հետո Բագրատունիները իշխանությունը պահպանել էին միայն Տաշիր-Ձորագետում: Դավիթ Անհողինի ժամանակ Կյուրիկյանները փորձեցին գլխավորել Հայաստանի քաղաքական կյանքը: Այդ քաղաքականությունը շարունակվեց Կյուրիկեի ժամանակ, սելջուկների արշավանքներից հետո եղած ժամանակաշրջանում (էջ 92): Աշխատությունը, կարծում ենք, ավելի կշահեր, եթե նրանում նաև քննվեին Տաշիր-Ձորագետի Կյուրիկյանների և Կախեթի նրանց ազգական Կյուրիկյանների կապերը, ինչպես նաև առավել համակողմանի հետազոտվեին Տաշիր-Ձորագետի նկատմամբ վրացական պետության ակտիվ քաղաքականության դրդապատճառներն ու հետևանքները: Այս առիթով պետք է նկատել, որ Ռ. Մաթևոսյանը համաձայն չէ՝ այն հետազոտողներին (Ղ. Մովսեսյան, Հ. Մանանդյան), որոնց կարծիքով վրացական ճնշումն է եղել Կյուրիկյան թագավորության անկման պատճառը (էջ 105), գտնելով, որ Տաշիրին ավելի շատ վտանգ էր սպառնում սելջուկների հաճախակի հարձակումներից, քորոնց հետևանքով Կյուրիկեի հաջորդները աստիճանաբար կորցրին իրենց տիրույթները» (էջ 105):

Գրախոսվող աշխատության վերջին՝ չորրորդ, գլխում հեղինակը քննության առարկա է դարձրել սոցիալ-տնտեսական հարաբերությունները Տաշիր-Ձորագետում X—XII դդ.: Նշելով, որ X դ. երկրի տարբեր մասերում կազմավորվել էին տեղական կամ նահանգային թագավորություններ, որոնց զահակալները վասալական կախման մեջ էին Բագրատունի շահնշահներից, և որ մեր պատմագիտության մեջ դրանց առաջացումը պայմանավորվում է տեղական ավատական հզոր տների կենտրոնախույս ձգտումներով, Ռ. Մաթևոսյանն ընդգծում է, որ Տաշիր-Ձորագետի և մյուս թագավորությունների կազմավորման նախադրյալները զգալիորեն տարբերվում էին և որ յուրաքանչյուր երկրամաս ուներ իր առանձնահատկությունները, առաջին հերթին հողատիրական իրավունքի տեսակետից: Տաշիր-Ձորագետի թագավորությունում, գտնում է նա, ինչպես ավատական հողատիրությունը, այնպես էլ կենտրոնական իշխանության հետ տեղական կառավարիչների հարաբերությունները մի քանի էական կողմերով տարբերվում էին Հայաստանի մյուս երկրամասերից: Ելնելով այս հիմնագրությունից, հեղինակն անցել է Բագրատունացի ուստանի ներսում առկա հողատիրության կատեգորիաների ճշտմանը: Ռ. Մաթևոսյանը միանգամայն իրավացիորեն նկատել է, որ քննվող ժամանակաշրջանի Հայաստանում ոչ բոլոր դեպքերում էին տեղական թագավորություններն առաջանում ավատական սեպարատիզմի հետևանքով: Նա գտնում է, որ Կյուրիկյան (և Կարսի) թագավորությունների կազմավորումը Բագրատունացի արքունիքի վարչական վերափոխումների արդյունք էր և թելադրված էր պետության շահերով:

Վերլուծելով աղբյուրներում Տաշիր-Ձորագետի կյուրիկյանների հողատիրության մասին եղած տվյալները, աշխատության հեղինակը հանգել է միանգամայն ընդունելի եզրակացության: Ըստ նրա, Գուրգենի տիրույթը կոչվել է «Հայրենի իշխանություն»: IX—XI դդ. այդպես են կոչվել այն հողերը, որոնց տերերի իրավունքները պայմանական են եղել և ոչ թե սեփականատիրական: Նման հողերում՝ «Հայրենի իշխանություններում» ավատներն ունեին իշխելու, կառավարելու իրավունք: Այստեղ Հայրենի ըստ Վկայում է, որ այդ «իշխանություններ» եղել է կյուրիկյանների հայրենիքը, բայց պայմանական-ժառանգական իրավունքով: Այլ կերպ, Գուրգենը՝ Բագրատունյաց կյուրիկյան ճյուղի հիմնադիրը, Տաշիր-Ձորագետի հայրենատեր չէր և երկիրը ասացել էր իր ազգապետ ու հայրազույժ հայոց շահնշահից և հենց դրանով էլ տարբերվում էր Սյունիքի ու Վասպուրականի զահակալներից: կյուրիկյանները փոխանցում էին իրենց իշխանությունը ժառանգաբար՝ հորից որդի: Դրանով իսկ նրանք տարբերվում էին վերակացուններից, որոնք այդ արտոնությունը շունեին: «Ուրեմն,—հեղափոխություն է Ռ. Մաթևոսյանը,—«Տաշիր երկիրը» հանձնելով իր տոհմակիցներին, արքունիքը այդ վասնական-ժառանգական տիրույթի նման հողերի տերերը պետք է իրենց իրավունքների հաստատումը ստանալին գերադասից (սյուզերենից): կյուրիկյանների սյուզերեններն էին հայոց շահնշահները, և Տաշիր-Ձորագետի Բագրատունի տիրակալը ենթարկվում էր շահնշահներին, ինչպես կրասերը՝ ավագին, վասալը՝ սյուզերենին: Նրա հողատիրական իրավունքը և դրա հետ անխզելիորեն կապված վարչաքաղաքական իշխանությունը այդ երկրում պայմանական բնույթ ուներ, քանի որ «Տաշիր երկիր» յուրաքանչյուր նոր կառավարիչ իր իրավունքների հաստատումը պետք է ձեռք բերեր շահնշահից» (էջ 120): Լեռինային իրավաբեր է, նկատելով, որ X—XI դդ. Հայաստանում թագավորական իշխանությունը եղել է երկու տիպի՝ «պայադատական և արքունատուր պարզե» (էջ 120): Նրա կարծիքով պայմանական-ժառանգական իրավունքներով օժտված Տաշիր-Ձորագետի տիրակալի թագավորական տիտղոսը պետք է ընկալել ոչ թե որպես «միապետ», պետության ղեկավար, այլ որպես դասային տիտղոս, իսկ «թագավորական իշխանությունը»՝ որպես բարձրաստիճան պաշտոն: Սա ուշագրավ եզրահանգում է և առ այսօր տեղական թագավորությունների պատմությամբ զբաղվողներն այդ հարցի վրա ուշադրություն չեն դարձրել:

Աշխատության մեջ որոշ տեղ է հատկացվել Տաշիր-Ձորագետում X—XI դդ. գյուղացիության իրավական վիճակում տեղի ունեցած փոփոխությունների քննությանը և նշված դրերում գյուղացիության ճորտացման պրոցեսի խորացումը իրավացիորեն պայմանավորվել է հոգևոր և աշխարհիկ ավատական խառն տնտեսությունների ստեղծմամբ: Ցանկալի կլինի, եթե հեղինակն ավելի հստակ շարադրեր իր կարծիքը Տաշիր-Ձորագետում գյուղական համայնքի և գյուղացիության շերտավորման հարցերի մասին:

Աշխատության վերջաբանում Ռ. Մաթևոսյանը, հանրագումարի բերելով իր հետազոտության արդյունքները, շեշտել է, որ Տաշիր-Ձորագետի թագավորության կազմավորման նախադրյալները, հայոց շահնշահների հետ նրա կառավարիչների փոխհարաբերությունների բնույթը, ավատական հողատիրության տեղական առանձնահատկությունները և դրանց հարակից հարցերը կազմում են Տաշիր-Ձորագետի թագավորության, որպես ավատական կազմավորման, առանձնահատուկ կողմերը: Նա նշել է, որ երկրամասի X—XI դդ. կյանքի հետազոտությունը ցույց է տալիս, որ այն անբաժանելի է Բագրատունյաց կենտրոնական պետության սոցիալաքաղաքական կյանքից:

Գիտական պատշաճ մակարդակով գրված այս աշխատությունը շատ ավելի շահած կլինի, եթե հեղինակն անդրադառնար նաև քննվող ժամանակաշրջանում Տաշիր-Ձորագետի մշակութային կյանքին, որն այդ ընթացքում, ինչպես հայտնի է, զգալի վերելք ապրեց: Ցավոք, աշխատության մեջ նկատելի են լեզվաոճական ու խմբագրական բնույթի որոշ մեղանշումներ և անգամ ոչ ճիշտ ձևակերպումների հակասականություն: Այսպես, օրինակ, գրքի 43-րդ էջում կարդում ենք. Տավուլը զբաղեցնում էր ներկայիս Շամշադինի շրջանի տարածքի մի մասը, իսկ 49-րդ էջում գրված է. «Շամշադինը համապատասխանում է հին Ուտիքի Տավուլ գավառին»: Իրականում ներկայիս Շամշադինի շրջանը զբաղեցնում է Տավուլ գավառի տարածքի լոկ մի մասը: Ամփոփելով նշենք, որ գրքիսովուղ աշխատության մեջ հեղինակի արած հարցադրումներն ու եզրահանգումները գիտական զգալի հետաքրքրություն են ներկայացնում: Մի շարք առանցքային հարցերի տրված են նոր մեկնաբանություններ: Այս ամենը հիմք է տալիս պնդելու, որ իր մեկնադրությամբ Ռ. Մաթևոսյանը զգալի ավանդ է ներդրել Բագրատունյաց Հայաստանի պատմության ուսումնասիրության ամբողջացման շնորհակալ գործում:

ԼԵՎՈՆ ԲԱՐԱՅԱՆ

Պատմական գիտությունների դոկտոր
ԱՐՏԱՇԵՍ ՇԱՀՆՍԶԱՐՅԱՆ